

四明叢書

張宗祥



四明文徵卷四

梅鄧賁 鈞陶軒輯

連珠 八首并序呈少傅蔣公

陳沂

少傅清湘蔣公名其居曰敬所書曰王敬作所公亦曰
臣敬作所蓋興居動息昭公之明德也乃演連珠八首
用發所聞堂與之地雖不可窺而門牆之外或得以標
識云

蓋聞啓鑰之門肆其入則躡承盤之水怠於捧則傾是
以入虛如有豈生形外之妄執虛如盈不蒙意外之驚

故君子獨已處室而若有所愧一善非足而如將弗勝
蓋聞端甫束形而趨蹌終日者易狎甲冑戒氣而老師
積歲者無勇何則中以制外而嚴心以臨事而恐故君
子務誠於雞鳴之未接加畏於龜卵之方動
蓋聞顏破於驚川而安流失揖神悸於九折而周道摧
輻何則智者戒於未形愚者憬於既辱故君子持衡觀
化以慎夫盈謙守默順時以欽夫倚伏

蓋聞咎與動隨則舉踵憂墜悖自言出則振舌恐絕是
以勿動之語顏回請事其門之警武公致切故君子履

王道之砥以謹下民之視宣至化之音以嚴上帝之格
蓋聞肅郊禋者不緣圭璧之在奉慎階陛者不以珩璜
之在躬何則禮藉於物而物不可以言禮中警於外而
外不當以在中故君子不易之戒示顯思於日監弗戢
之懼勉克德以協恭

蓋聞奮臂之螳致畏於獵者拱立之鳳稱禮於詩人何
則勇可懾心則賤貴罔擇儀能動貌則巨眇惟均故君
子不輕瑣才以周應世之用不忽細德而洪造化之鈞
蓋聞萬夫之圍潰於一夫之說十年之守破於朝夕之

攻是以直其內則同德而享利勝其怠則進言而辭凶
故君子不以三公易其介不以一日儻其躬

蓋聞畏於溺者有濟冰之疑懼於虎者有射石之利何
則畏之甚則役慮未安慎之密則抵力易至故君子不
便辟畏敬以正禮於家邦惟威儀敬慎以作則於卿士

擬唐顏杲卿諭河北諸郡檄

鄭 真

天寶十四年某月某日常山太守顏杲卿檄告諸郡等
蓋聞建邦設屏實惟有道之長秉律成師合正無將之
誅守臣當爲君而效死義士不與賊而俱生盍濟奇謀

其成偉績我國家德躋仁壽道合希夷萬年敬休寢兵
戎而不試四時生育與草木而皆春蠢茲狂賊之微敢
味聖恩之大安祿山醜胡遺孽敗將俘囚傾巧事人公
行賄賂姦邪罔上雜出詼諧入宮禁而無嫌睨皇儲而
不拜寵兼僕射位極眞王向嘗指腹以爲赤心今敢率
衆而操白刃范陽數千里莽爲蛇豕之區河關幾十州
盡作豺狼之藪塗炭我黔庶腥穢我冠裳指斥將相之
臣凌轢王侯之貴吠堯之犬謂秦無人聖上渙號旁行
乾綱獨斷聽鼓聲而思猛士式靖四方提斧鉞以授元

戎用昭九伐凡屠率土不共戴天稱爾千比爾戈從公
子邁言秣軍言秣馬與子偕行大收執訊之威用致獻
囚之盛幕府職居守土命寄專城泣血剖心爰勤軍師
之眾臥薪嘗胆忍忘君父之讎方異類之鯨奔幸羣心
之麾起郭元帥整朔方之甲李兵使興馬邑之師張睢
陽保障江淮哥潼關控臨畿甸止戈爲武當鋒者摧將
除河洛之腥羶載見乾坤之日月凡茲有民有社實惟
同德同心不食哭秦廷期盡包胥之義左袒爲劉氏其
推周勃之忠勿爲守窟之謀當爲輔車之勢驚急捷邊

烽之報傳聲嚴羽檄之馳俾鼠竊而狗偷若獸蒐而禽
獮至於京洛義士趙代奇才見無禮於其君益昌言於
下眾審其逆順以爲從違或斬首以迎降或據城以來
獻事功苟就富貴可圖怒豈止於衝冠勇俟聞於投袂
獬狁孔熾我是急擬成敵愾之功匈奴不滅何家爲名
效委身之智機不可失時豈再來用胥告於同盟俾咸
知於此意急如律令拱聽指揮

爲莊太常作城守檄

林奕隆

蓋自都省淪陷忠義憤興八陣風雲行者已爲社稷之

役一城煙火居者豈無桑梓之謀塞外烽火未消慘聞
六橋花柳之地盡染煙塵梁閒燕雀可賀忍看雙湖日
月之區遽流膏血半畝宮一廛市生長歌笑於是詎避
地遂可忘情三男戶八口家山林川谷之閒非攜眷便
云得計重以巨測宜有周防旌旗蔽江北軍縱難飛渡
綢繆貴未雨之圖弓矢戾泮眾志卽能成城虎豹踞在
山之勢采芑口試師於六月蓄艾備患於三年是用徧
告同人共圖旣濟儒服登陴以禦侮何減會稽之君子
六千樽俎折衝而談兵奚必軒轅之邱井五八坐籌六

出之奇佇受四明之福

擬梁王僧辯平侯景露布

鄭真

尙書令大都督臣王僧辯等臣某聞成周大法聿嚴九
伐之誅漢室龍興爰正三臣之戮方嗣聖紹無疆之歷
而逆凶當極惡之刑肆告成功聿彰大孝恭惟皇帝陛
下慈愛恭儉果毅仁彊有經文緯武之資慨遺大投艱
之會當饋興歎副四海載日之心嘗膽臥薪雪二聖在
天之憤睠茲凶逆寧後誅夷侯景芻狗微生犬羊遺孽
託身高氏盡忘羽翼之恩逃命宇文復作叛亡之計我

高祖武皇帝仁同一視道合三無謂其慕義而來歸戎
可革心而易面獼猴出穴未膺狙使之勞飛鳥依人遽
有鷹揚之志假自壽陽之境簞揚江上之波烽火接於
秦淮戈及交乎譏旬塗炭黔庶腥穢冠裳圍逼臺城屢
動宵衣之警震驚宮闕俄成晏駕之悲簡文皇帝事重
宅憂親遭降割志每存乎靖難思尤切於好生隆爵重
封用廣包容之量窮凶極惡曾無悛改之心廢置比於
弈棋弁髦視如土梗卜讎挾刃本諸慶父之謀成季抽
戈直指馬昭之罪是宜爲君而效死可能與賊而俱生

某等受寄齋壇謬膺將鉞始留巴陵之戍任約就擒薦
揚漢口之威化仁請縛子仙棄郢城而身爲俘馘于廣
棄郭默而躬在逃遁役不淹時士有餘勇舳艫數百里
駭動鯨鯢鼙鼓億萬兵威陵虎豹愛振潯陽之旅薦成
姑孰之勲顧死灰之復燃慮困獸之猶鬪石城頭列柵
命霸先往扼其衝招提寺進師俾王琳獨當其銳應機
而潰奮臂大呼傾城無匹馬之還僨轍寧隻輪之返元
惡竄身而入海黨與稽首而來庭肆發命以窮追不渝
期而克獲食越彭之醢頃刻無餘燃董卓之膽光明達

且載復三吳之舊盡驅九軌之塵江漢朝宗山河改色
茲蓋仁聖不殺威武布昭運奇掌上之吳制勝目中之
虜赫怒而安天下誰其禦之遄歸以正故都維其時矣
臣某等恭承廟算忝與行閒乘六龍以馭天順返翠華
之仗衛掩七戎而得駿敢忘鐵汗之驅馳臣某等不勝
慶快之至謹差某官姓某露布以聞軍資器械別錄條
上某年某月某日具官姓某上

吾子行夢蝶壇疏

任士林

誦五千言嘗究猶龍之旨以六月息載開夢蝶之壇善

戲謔兮志怪者也載惟貞白方丈布衣道士存方寸地
臥百尺樓有淳千髡之滑稽有東方朔之博物賈誼升
堂相如入室惜不用賦於夫子之門李邕識面王翰卜
鄰肯歎誤身於丈人之聽於是心造蟬蛻之境神遊鳥
跡之初遽遽然栩栩然何必扶搖三千里九萬里閭闔
也侃侃也不訪歸詠五六人六七八人莫笑邊孝先請問
南華子

買屋疏

任士林

擇遊斯擇居每羨江湖之樂問館必問舍豈無交友之

情相與謀一枝之安或者謂諸公之寶況錢塘亦士大夫之冀北公安歸乎而西湖豈捷徑者之終南吾無隱爾不用旋栽楊柳何妨高詠梅花須知束書有屋廬便可借車載家具王翰卜鄰李邕識面尙尋杜曲清風司馬買宅鄭公置園猶是伊川盛事允爲佳話各載芳題

和陶淵明歸去來辭

汪大猷

歸去來兮謫居三年今將歸荷聖恩之無終棄徒感涕以成悲每自訟其前謬雖駟馬而莫追旣脫名於丹籍亦兩忘其是非念昔叨於朝列曾無補於宵衣佩乾坤

之德厚恨蛇雀之報微眷予衰晚流年似奔亟理征棹
前趨里門松楸在望親戚俱存問訊三徑放懷一尊洗
胸中之磊塊回暮景於韶顏將無往而不適故雖貧而
亦安忘勢利之汨沒絕人事之交關歎世路之嶮巇鹽
止水以默觀顧禍福之倚伏乃天道之好還相前哲之
遺訓常思奉以周旋歸去來兮蓋嘗聞之少游取衣食
之裁足何盈餘之苦求與其身之可樂孰若心之無憂
兄弟羣居於敝廬伏臘仰給於先疇園有名花湖有扁
舟兔尙營乎三窟狐猶念於首邱矧吾生之漫仕惟委

順以乘流久倦游而樂閒亦至是而宜休已矣乎聰明
不及乎前時何必霸而封留豈不能隨遇而安之達哉
白居士樂乎榮啓期存方寸之餘地付子孫以耕耔庶
幾安分之義無愧式微之詩惟知足之常足適翁歸去
樂無疑

大猷負罪謫居旣蒙恩許還田里卽日治歸道中嘗
擬和淵明辭以寓歡欣感激之意舟次於越遇故人
趙子直攜酒來過勤勤相勞苦酒半乃爲作大字適
齋成遂刻之壁閒足以榮其老矣淳熙己亥十月望